

Na osnovu Odluke Dekana Poljoprivredno–prehrambenog fakulteta Univerziteta u Sarajevu, Osnivačka skupština „Alumni asocijacije Poljoprivredno–prehrambenog fakulteta Univerziteta u Sarajevu“, na sjednici održanoj u Sarajevu dana 21.03.2017. godine, donijela je

**PRAVILNIK**  
**ALUMNI ASOCIJACIJE POLJOPRIVREDNO – PREHRAMBENOG**  
**FAKULTETA UNIVERZITETA SARAJEVO**

**I. OPĆE ODREDBE**

**Član 1.**

Alumni asocijacija Poljoprivredno–prehrambenog fakulteta Univerziteta Sarajevo je asocijacija u koju dobrovoljno pristupaju svi oni koji su diplomirali, magistrirali ili doktorirali na Poljoprivredno – prehrambenom fakultetu.

Osnovni cilj Alumni asocijacije je ostvarivanje trajne i uzajamne koristi i interesa njenih članova i Poljoprivredno–prehrambenog fakulteta utvrđenih ovim Pravilnikom.

**Član 2.**

Ovim Pravilnikom se uređuju organizacijski i djelotvorni elementi Alumni asocijacije Poljoprivredno – prehrambenog fakulteta Univerziteta Sarajevo:

- opće odredbe, područje djelovanja
- naziv i sjedište Asocijacije, te oblik i sadržaj pečata
- predstavljanje i zastupanje Asocijacije
- javnost rada Asocijacije
- ciljevi i djelatnost Asocijacije
- članstvo, prava i obaveze članova
- unutrašnja organizacija i upravljanje
- sredstva za rad Asocijacije
- prestanak rada Asocijacije
- donošenje pravilnika o radu i drugih općih akata Asocijacije
- udruživanje Alumni Asocijacije
- prelazne i završne odredbe.

**Član 3.**

Naziv asocijacije je na BHS jezicima: Alumni asocijacija Poljoprivredno–prehrambenog fakulteta Univerziteta Sarajevo, a na engleskom Alumni Association of the Faculty of Agriculture and Food Sciences of University Sarajevo. Na svim jezicima skraćenica je: AAPPFUNSA (u daljem tekstu).

Sjedište AAPPFUNSA je u Sarajevu, Poljoprivredno–prehrambeni fakultet, Zmaja od Bosne 8, 71000 Sarajevo.

#### Član 4.

AAPPFUNSA je neprofitna, nevladina i nestranačka asocijacija. Područje djelovanja je Bosna i Hercegovina, a članovi mogu biti iz cijelog svijeta.

#### Član 5.

AAPPFUNSA koristi pečat Poljoprivredno – prehrambenog fakulteta Univerziteta Sarajevo (u daljem tekstu PPF UNSA). Pečatom se ovjeravaju opći i drugi akti, te finansijska i druga dokumentacija AAPPFUNSA.

Znak AAPPFUNSA je isti kao znak Fakulteta (zelena knjiga) s dodatim tekstom ispod znaka: Alumni asocijacija i Alumni Association.



#### Član 6.

AAPPFUNSA predstavlja i zastupa predsjednik, a u slučaju njegove spriječenosti njegov zamjenik ili sekretar AAPPFUNSA.

Ovlašteni potpisnik AAPPFUNSA je predsjednik Alumni asocijacije.

## II. CILJEVI I ZADACI

#### Član 7.

Osnovni ciljevi postojanja i rada AAPPFUNSA su:

- uspostavljenje i održavanje trajne veze između PPF UNSA i njegovih studenata, magistranata i doktoranata nakon završetka studija,
- povezivanje svih bivših studenata PPF UNSA u asocijaciju kako bi se omogućila njihova pedagoška, naučna i stručna saradnja,
- unaprijeđenje rada PPF UNSA u smislu posjedovanja adekvatnih i blagovremenih informacija vezanih za struku koje mogu obezbjediti članovi AAPPFUNSA,
- razvijanje saradnje PPF UNSA sa srodnim institucijama u BiH i svijetu u kojima djeluju njeni bivši studenti članovi AAPPFUNSA,
- motivacija članstva kroz razvijanje projekata vezanih za cjeloživotno učenje,

- učešće u međunarodnoj pedagoškoj, stručnoj i naučnoj razmjeni kroz uspostavljanje dobrih odnosa s drugim sličnim asocijacijama i srodnim institucijama,
- afirmacija mjesta i uloge visokog obrazovanja u bosansko-hercegovačkom društvu,
- afirmacija mjesta i uloge poljoprivrede i prehrambene industrije u bosansko-hercegovačkom društvu,
- deklarativna i stvarna zaštita interesa poljoprivredno-prehrambene struke prema akademskim kodeksima i pravilima struke,
- diseminacija znanja i vještina poljoprivredno-prehrambene struke i nauke u širu javnost.

### **Član 8.**

Zadaci AAPPFUNSA prema postavljenim ciljevima će odvijati se kroz sljedeće aktivnosti:

- svim članovima omogućiti on-line i drugi vid registracije, brz i efikasan pristup informacijama o PPF UNSA i nesmetano uspostavljanje međusobnih kontakata,
- osnovne informacije o radu i projektima AAPPFUNSA redovno stavljati na web stranicu i u druge informativne medije koje izdaje PPF UNSA,
- organiziranje okruglih stolova, seminara, konferencija, simpozija i sl. koji će tretirati pitanja interesantna za PPF UNSA i članove AAPPFUNSA,
- organiziranje raznih obrazovanih programa za članove AAPPFUNSA u kontekstu bolje informiranosti o aktuelnim problemima u poljoprivredno-prehrambenoj struci,
- organiziranje stručnih, razvojnih i naučnih projekata u kojima bi učestvovali i članovi AAPPFUNSA koji nisu uposlenici PPF UNSA,
- organiziranje susreta članova AAPPFUNSA sa studentima PPF UNSA kako bi im prenijeli svoja praktična znanja u naučno stručnim oblastima u kojima djeluju,
- organiziranje susreta članova AAPPFUNSA povodom obilježavanja važnih datuma PPF UNSA i organiziranja tekućih stručnih, razvojnih i naučnih projekata,
- organizirati susrete sa drugim srodnim Alumni organizacijama i srodnim institucijama (npr. Fakultetima, Institutima, i sl.),
- pružanje podrške članovima AAPPFUNSA u unaprijeđenju poljoprivredno-prehrambene struke u institucijama u kojima rade,
- obezbjeđenje posebnih privilegija za članove AAPPFUNSA tamo gdje je to moguće, npr. biblioteke, baze podataka, online katalogi, bibliografije, zatim pristup knjigama i ukupnom bibliotečkom fondu PPF UNSA i sl.

## **III. ČLANSTVO, PRAVA I OBAVEZE**

### **Član 9.**

Članom AAPPFUNSA postaje se potpisivanjem pristupnice ili on-line registracijom. Odluku o prijemu donosi Upravni odbor.

Pristup i članstvo u AAPPFUNSA su besplatni.

### **Član 10.**

Počasni članovi AAPPFUNSA mogu biti zaslužne osobe koji nisu bili studenti PPF UNSA. Odluku o počasnom članstvu donosi Upravni odbor na prijedlog predsjednika.

Inicijativu za počasnog člana može dati svaki član PPFUNSA.

### **Član 11.**

AAPPFUNSA može davati priznanja svojim članovima, ali i zaslužnim licima koja nisu bili studenti PPF UNSA, a koji su imali značajan doprinos u oblasti pljoprivrede i prehrambene tehnologije u BiH, shodno prethodnom članu.

## **IV. ORGANIZACIJA AAPPFUNSA - UPRAVLJANJE**

### **Član 12.**

Organi AAPPFUNSA su:

- Skupština
- Upravni odbor
- Predsjednik
- Sekretar

### **Skupština**

### **Član 13.**

Skupština je najviše tijelo upravljanja AAPPFUNSA i čine je svi redovni članovi asocijacije.

Za donošenje pravovaljanih odluka na Skupštini mora biti prisutno najmanje dvadeset (20) redovnih članova Skupštine.

Odluke se donose većinom glasova prisutnih redovnih članova.

### **Član 14.**

Skupštinu saziva predsjednik Upravnog odbora najmanje sedam dana prije održavanja.

Poziv i javni oglas sadržavaju vrijeme i mjesto održavanja sjednice i njen dnevni red.

Prijedlog dnevnog reda Skupštine utvrđuje Upravni odbor.

Skupština raspravlja i odlučuje na sjednicama.

Radom Skupštine rukovodi radno predsjedništvo koje broji tri (3) člana i koje se bira na svakoj sjednici.

### **Član 15.**

Skupština zasjeda po potrebi, a najmanje jednom u četiri godine.

### **Član 16.**

Skupština vrši naročito sljedeće poslove:

- donosi Pravilnik, izmjene i dopune i druge akte
- bira i opoziva predsjednika i sekretara
- bira i opoziva Upravni odbor
- donosi program rada
- raspravlja i odlučuje o izvještajima predsjednika i Upravnog odbora
- odlučuje o svim pitanjima koja nisu u nadležnosti drugih organa.

## **Upravni odbor**

### **Član 17.**

Upravni odbor je izvršno tijelo Skupštine i čini ga pet redovnih članova. Članove Upravnog odbora bira Skupština. Dva člana Upravnog odbora su iz redova uposlenika Poljoprivredno-šrehrambenoh fakulteta Univerziteta u Sarajevu. Sekretar AAPPFUNSA je istovremeno i član Upravnog odbora.

### **Član 18.**

Mandat Upravnog odbora je četiri godine sa mogućnošću reizbora.

### **Član 19.**

Upravni odbor obavlja sljedeće poslove:

- vodi poslovanje AAPPFUNSA a
- izvršava odluke i zaključke Skupštine
- donosi godišnji plan rada
- utvrđuje prijedlog finansijskog plana i završnog računa
- utvrđuje prijedlog Pravilnika AAPPFUNSA i njegove izmjene i dopune, odluke i druge opće akte
- osniva stalna i povremena tijela kojima povjerava pojedine zadatke
- odlučuje o saradnji i održava veze s drugim asocijacijama
- predlaže Skupštini Program rada AAPPFUNSA
- izvršava Program rada koji utvrđuje Skupština, odluke i akte
- izdaje priopćenja o radu AAPPFUNSA
- podnosi Skupštini izvještaj o svom radu
- brine o unaprijeđenju rada i djelatnosti AAPPFUNSA
- imenuje predstavnika AAPPFUNSA u druga tijela, udruženja i asocijacije
- obavlja i druge poslove i zadatke koje mu povjeri Skupština ili koji su zakonom ili ovim Pravilnikom stavljeni u njegovu nadležnost.

## **Predsjednik**

### **Član 20.**

Predsjednik AAPPFUNSA predstavlja i zastupa AAPPFUNSA, potpisuje akte koje donosi Upravni odbor, priprema i vodi sjednice Skupštine, organizira sve aktivnosti, brine se o projektima i zadacima AAPPFUNSA i odgovoran je Upravnom odboru za zakonitost rada AAPPFUNSA.

Predsjednik Alumnija podnosi izvještaj o radu AAPPFUNSA Upravnom odboru i Skupštini.

## **Sekretar**

### **Član 21.**

Sekretar AAPPFUNSA ima funkciju koordinatora.

Sekretar priprema prijedloge akata i odluka koje donosi Skupština, Upravni odbor i predsjednik.

Za svoj rad sekretar odgovara Skupštini, predsjedniku i Upravnom odboru AAPPFUNSA.

## **V. SREDSTVA ZA RAD AAPPFUNSA**

### **Član 22.**

AAPPFUNSA se finansira iz sljedećih izvora :

- prihodi ostvareni u skladu sa zakonom
- pomoć i donacije pojedinaca i pravnih subjekata za određene programe i projekte
- donacije iz podračuna za umjetničku, naučnu i stručnu djelatnost
- prihodi od imovine i prava
- ostali oblici finansijske i materijalne pomoći
- članarine??

## **VI. JAVNOST RADA ASOCIJACIJE**

### **Član 23.**

Rad AAPPFUNSA je javan i predstavljen na web stranici PPF UNSA. Komunikacija sa članstvom ostvaruje se elektronskom ili običnom poštom, lično i na drugi način. Javnosti se mogu uskratiti informacije koje su poslovna i druga tajna AAPPFUNSA ili PPF UNSA.

### **Član 24.**

AAPPFUNSA saraduje sa udruženjima i asocijacijama vezanim za struku. AAPPFUNSA prestaje sa radom odlukom Skupštine.

### **Član 25.**

Za pitanja koja nisu regulisana ovim Pravilnikom primjenjivat će se odredbe Zakona o udruženjima i fondacijama.

### **Član 26.**

Pravilnik stupa na snagu danom donošenja na Osnovačkoj skupštini, a objavit će se na web stranici PPF UNSA.

Tumačenje odredbi Pravilnika daje Skupština.

**Predsjedavajući Osnivačke skupštine**

**Prof. dr Pakeza Drkenda**

Sarajevo, 21.03.2017.